

Svečano otvorena nova „Plava“ džamija u džematu Oraš Planje.

U nedjelju 09. 09. 2012. godine na dan općinskog praznika – Dan oslobođenja općine Tešanj od fašizma u II svjetskom ratu, u prisustvu njegove eminencije Reisu-l-uleme IZ-e u BiH dr. Mustafe ef. Cerića, njegovog izaslanika Muftije tuzlanskog mr. Husein ef. Kavazovića, Muftije zeničkog mr. Ejub ef. Dautovića, Muftije Zagrebačkog-Hrvatske dr. Aziza Hasanovića, i brojnih drugih zvanica te preko 20.000 vjernika svečano je otvorena nova „Plava“ džamija u džematu Oraš Planje, Medžlis IZ-e Tešanj.

Džamiju je otvorio najznačajniji vakif i predsjednik Građevinskog obora za njenu izgradnju hadži Nazif Ćorić zvani „Huso“ iz Oraš Planja, a ulaz za žene hadži Mejra Hatkić.

Džamiju je proglasio otvorenom i vlasništvom Islamske zajednice u Bosni i Hercegovini izaslanik Reisu-l-uleme IZ-e u BiH Muftija tuzlanski mr. Husein ef. Kavazović.

Program u povodu svečanog otvorenja ove prelijepa džamije započeo je u petak 7. septembra 2012. godine klanjanjem prve džume u ovoj džamiji, kada je hutbu održao direktor Gazi Husrev-begove medrese u Sarajevu Zijad ef. Ljevaković prof., a džumu-namaz predvodio glavni imam Medžlisa IZ-e Tešanj mr. Fuad ef. Omerbašić. Čast da bude prvi hatib na džumi u ovoj džamiji pripala je Zijadu Ljevakoviću jer je isti bio i glavni vaiz na polaganju kamena temeljca za izgradnju ove džamije.

Mevludskoj svečanosti upriličenoj u ovoj džamiji u subotu 08.09.2012.g. poslije akšam-namaza prisustvovao je neuobičajeno velik broj posjetilaca.

Selame i izraze dobrodošlice zvanicama i prisutnima uputio je džematski imam Suljo ef. Djedović prof.. Mevlud, prigodne ilahije i salavate proučili su imami i Hor Medžlisa IZ-e Tešanj te imami drugih medžlisa, a prisutnima su se obratili glavni imam Medžlisa IZ-e Tešanj mr. Fuad ef. Omerbašić i dr. Šefik Kurdić.

U nedjelju, 09. 09. 2012. svečano je otvorena džamija. Program je započeo Muris ef. Bračkan učenjem Kur'ana, nakon čega je moderator programa džematski imam Suljo ef. Djedović selamio prisutne i pozvao ih da prouče Fatihu pred duše Vakifa IZ-e u BiH i šehida, kratko upoznao prisutne o historijatu džemata, a potom pozvao da se obrate:

Predsjednik džematskog odbora Adem Mahalbašić koji je nadahnuto govorio o džematu i gradnji džamije.

Glavni imam Medžlisa IZ-e Tešanj mr. Fuad ef. Omerbašić: *„Ovo je važan dan za muslimane Oraš Planja kao i značajan događaj za Medžlis IZ-e Tešanj. O značaju i važnosti današnjeg dana govori vaše prisustvo u ovolikom broju...Otprilike 1463 godine po Isa a.s. u Bosnu je došao glasnik sa vijestima o Šehadetu. Dobri Bošnjani su pažljivo saslušali taj haber i jasno ga prepoznali u svom srcu kao putokaz u životu na ovom prolaznom svijetu. Taj haber i danas baštine kod sebe između ostalog i kroz vakuf kao trajno dobro. Da se podsjetimo 1531 god. Gazi Husrev-beg je uvakufio imanje na prostoru današnjih Planja u ime Allaha a za dobrobit muslimana. Ono što nas posebno raduje jeste da se aktivnost na vakufu kao trajnom dobru intenzivira u posljednje vrijeme o čemu svjedoči ova džamija koja sa dva minareta simbolizira zajedništvo dina i ummeta. Također ova džamija poručuje da će i ubuduće vakuf i vakif, kroz Islamsku zajednicu činiti jednu cjelinu baš kao što ova dva minareta čine cjelinu ove džamije. Zato su muslimani Tešnja zahvalni svima onima koji nakon Sultan Mehmeda Fatiha, Gazi Husrev-bega, Gazi Ferhad-bega ponovo ostavljaju tragove na ovim prostorima. Ti tragovi su vidljivi kroz ovu prelijepu džamiju kroz koju možemo prepoznati nove gazije, vakife, insane, koji daju legalitet i legitimitet Islamskoj zajednici na ovim prostorima. Također, ti tragovi kroz Islamsku zajednicu, kroz zajedništvo u vjeri i sudbini poručuje svima nama: ostajte ovdje, ovo je vrijeme i breme naše odnosno vaše odgovornosti, borite se za svoje dostojanstvo. Nemojte ljepotu vremena pretvarati u ružan san, nemojte grijeh zamjenjivati za vječnu radost duše, kao ni da vrijeme sadašnjosti bude tragično vrijeme vaše budućnosti.*

Braćo i sestre hoću da vjerujem da će današnji svečani čin otvaranja ove džamije biti doprinos u jačanju i razumijevanju islamske zajednice, u kojoj će svaki pojedinac naći svoje mjesto kao što će zajednica naći sigurnost u snazi svojih pojedinaca“.

Općinski načelnik hadži Fuad Šišić dipl.ing.maš., prisutnima je čestitao općinski praznik 9. septembar - Dan oslobođenja općine Tešanj od fašizma u II svjetskom ratu i naglasio potrebu izgrađivanja ljudske ličnosti i daljnijeg jačanja međuljudskih odnosa „*Mnogo brže gradimo infrastrukturu, džamije, puteve, od izgradnje samih sebe...*“ istakavši pri tome da je tajna uspjeha ove lokalne zajednice upravo u poduzetnosti i vlastitoj kreativnosti, te sinergiji -zajedničkom djelovanju svih subjekata društva u čemu Medžlis IZ-e Tešanj ima značajnu ulogu.

Muftija zagrebački dr. Aziz Hasanović govorio je o značaju džamija kao Božijih kuća koje su muslimanima znak identifikacije i njihov povijesni orijentir iz kojih se šalju poruke mira, ljubavi, uvažavanja i poštovanja.

Muftija zenički mr. Ejub ef. Dautović u svojoj besjedi, između ostaloga, istakao je: „*Muslimani Bosne bi trebali svako jutro proučiti četiri fatihe: jednu Sultan Fatihu, koji je na ove prostore donio vjeru islam, Gazi Husrev-begu, koji je otvarao škole, bosanskom sultanu rahmetli Aliji Izetbegoviću, koji je nas je učio slobodi govoreći da je sloboda najveće bogatstvo i najveći dar od Boga, i našim šehidima koji su branili vjeru, domovinu, slobodu, čast i dostojanstvo*“.

Izaslanik Reisu-l-uleme IZ-e u BiH i jedan od kandidata za novog Reisu-l-ulemu tuzlanski Muftija mr. Husein ef. Kavazović apostrofirao je „*Muslimani Bosne i Hercegovine trebaju se čvrsto držati za Allahovo uže i ne razilaziti se. Krajevi užeta su naši međaši, a njih je kroz povijest ostavljala naša ulema, pa je zadaća na nama da to uže čvrsto držimo, slijedeći Allahove dž.š. upute, i praksu Muhammeda a.s*“.

Obraćanje izaslanika Reisu-l-uleme na trenutak je prekinuto iznenadnim dolaskom Reisu-l-uleme IZ-e u BiH dr. Mustafe ef. Cerića, praćen tekbirima, a potom i velikim aplauzom (koji je iz Sarajeva došao na ovu svečanost samo da bi se obratio prisutnima i čestitao džematu, Medžlisi i IZ-i na ovoj prelijepoj džamiji, proučio dovu i odmah se vratio u Sarajevo na veliki međunarodni međureligijski skup pod nazivom „Naša je budućnost živjeti zajedno“).

Reis ef. je čestitao džematu Oraš Planje i Medžlisi IZ-e Tešanj na dosadašnjim uspjesima, posebno izdvojivši prikupljanje zekata i sadekatu-l-fitra, zahvalio se domaćicama i džematlijama ovog džemata na najboljem iftaru kome je prisustvovao u ovoj džamiji prije dvije godine te poručio: „*Mi za Balkan moramo imati državnu liniju odbrane, svoju stražu i svoju nacionalnu liniju odbrane. Mi volimo ljude, nismo narod koji mrzi, ne svetimo se. Tribunal u Hagu je radi nas i genocida i zločina nad nama osnovan. Imamo šasnu da uspijemo, ali ne smijemo dozvoliti da imamo više ministara nego naroda. Mi ćemo iz Sarajeva odaslati poruku mira i tolerancije*“.

Osvrćući se na predstojeći izbor novor Reisu-l-uleme u BiH rekao je da ima povjerenje u islamsku ulemu u BiH i u Sabor IZ-e, koji će uspjeti izabrati najboljeg.

Prije proglašenja džamije otvorenom Muftija zenički je uručio Priznanja za doprinos u radu i afirmaciji IZ-e Općinskom načelniku Fuadu Šišiću, predsjedniku GO za izgradnju ove džamije hadži Nazifu Ćoriću i džematskom imamu Sulji ef. Djedoviću prof.

Ključeve džamije izaslaniku Reisu-l-uleme uručio je predsjednik IO Medžlisa IZ-e Tešanj Zehrudin Kruško, nakon čega je izaslanik Reisu-l-uleme Muftija tuzlanski mr. Husein ef. Kavazović proglasio džamiju otvorenom i vlasništvom Islamske zajednice u BiH i svoje pravo da otvori džamiju ustupio najznačajnijem vakifu i predsjedniku GO za izgradnju džamije hadži Nazifu Ćoriću koji je, uz tekbiere prisutnih, džamiju svečano otvorio, a ulaz za žene otvorila hadži Mejra Hatkić.

Džemat Oraš Planje ima oko 240 domaćinstava. Danas se na njegovom području nalaze dvije džamije, dvije vakufske kuće, mesdžid i gasulhana. Prva džamija je izgrađena 1935.godine, na istom mjestu izgrađena nova 1970. godine, koja je rekonstruisana 2007/2008.g. i sada je u funkciji. Njene dimenzije su 10 x 12 m, mahfila 10 x 6 metara, ukupna površina 180 m/2.

Nova „Plava“ džamija u džematu Oraš Planje je izgrađena na prostranom platou uzvišenja Orašćić u samom centru ovog živopisnog naselja.

Pored postojeće džamije koja je u funkciji, ovo je druga džamija u ovom džematu koja je izgrađena vlastitim radom i sredstvima džematlija ovog džemata.

U njenu izgradnju uloženo je hiljade radnih sati dobrovoljnog rada i preko 500.000,00 KM.

Dimenzije džamije su 23 x 14 m, mahfila 14 x 9,00 m, a ukupna površina iznosi 448 m/2). Džamija je potkupolna. Prečnik centralne kupole je 11,00 m, a visina 13,80 m.

Uz džamiju su izgrađene dvije munare visine 42,00 m, vakufska kuća sa mektebskom učionicom i gasulhana, sa mokrim čvorom.

Kamen temeljac za izgradnju džamije položen je 11. avgusta 2006.g.

Prilikom posjete Reisu-l-uleme IZ-e u BiH dr. Mustafe ef. Cerića šehidskoj porodici – djedu i unuku bez oba roditelja u ramazanu 2010.g., u ovoj džemiji je priređen narodni iftar kome je pored Reisu-l-uleme prisustvovao i Muftija zenički mr. Ejub ef. Dautović, glavni imam Medžlisa IZ-e Tešanj mr. Fuad ef. Omerbašić, predsjednik IO Medžlisa IZ-e Tešanj hadži Edib Turalić, Općinski načelnik hadži Fuad Šišić i preko 300 džematlija i džematlinki ovog džemata.

Konačan izgled džamija je dobila završetkom radova 01. 09.2012.g.

Projekat za džamiju izradila je tešanjaska projektantska kuća „ABIJAS“, radove na izgradnji džamije izveli su domaći neimari, a munare poznati ovdašnji graditelj hadži Muharem Kruško.

Izgradnom ove džamije, Medžlis IZ-e Tešanj privodi kraju projekat poslijeratne obnove i izgradnje vjerskih objekata na području Medžlisa IZ-e Tešanj, kojim je izgrađeno 16 novih džamija od čega 10 na mjestima gdje ih ranije nije bilo i 1 na mjestu porušene u ratu, a na preostale 22 džamije izvršeni su zahvati rekonstrukcije, restauracije i proširenja , tako da su danas sve džamije u punoj funkciji.

MEDŽLIS ISLAMSKJE ZAJEDNICE TEŠANJ